



Herremättli Clique 1998

Sujet:

Dä Bäär het uns in d'Pfanne ghaue

S'isch emool aine gsi

(Ich lach mi hit no hii)

Dä het gsait: „ich gang uff d'Pirsch!

Mit der Flinte erleg ich hit e Hirsch!

D'Schoofmatt isch mi Revier“, blagiert är doll,

„Den het's die scheenschte Hirsch, ganz wundervoll.“

Är liggt uff em Aastand, so dien d'Jääger saage,

D'Flinten im Aaschlag, är isch barat zem Jaage.

Do kunnt e Hirsch zem Waldrand uss,

Jä nai, oh Schregg, was fir e Gruus!

Was zem Gugger kunnt do derhäär?

Nundedie, das isch jo e Bäär!

Är segglet was er seggle ka,

In der Druube z'Oltige drifft är Kollegen aa.

„Looset au, was mir isch basiert,

e Bäär isch iber d'Scheeflimatt spaziert!

Ich han en gseh, zwai Meter gross, e Riesedier.

In d'Hoose gschysse han i schier!“

Der Wildhieter und der Jagdverwalter

Nämme dr Stämpfel uss em Stämpfelhalter:

„Abschussbewilligung für einen Mutz“.

E Bligg-Reporter dänggt scho an Schutz,

Wo-n-är uss dr Story in Fortsetzige will uuseschloh,

Schryybt iber d'Risike, wenn de vor em Bäär duesch schtoh.

Är empfielt: „Drifsch uff dr Schoofmatt dr Bäär

So froggsch nit lang, wo will er hi, wo kunnt er här!

Liggsch uff dr Boode, schtellsch di doot

Und wartisch bis s'Bäärli wytergoht!“

Und d'Bligg-Lääser sinn dernoo voll derbyy,
Jede will dr neggschti syy
Wo-n-en gseht, unsere wilde Bääre-Maa.
Hit isch Grällige und mom Laufe draa.

Vo Schönebuech bis Amme',
Vom Bölche bis zum Rhy,
Do liggt das schööni Ländli,
Wo d'Bääre dehaime syy!

Mom gang ich als Old Schätterhänd
Ins Baselbieter Oberländ,
Dr Bääredeeter nimm ich mit,
Bäärepfäffer isch dr Hit!

Bruunbäär, Naasebäär, Brillebäär,
Ysbäär, Grizzlybäär, Pandabäär,
Ameisebäär, Weschbäär, Teddybäär,
Uffbunde hänn die uns e Bäär!
Wäder Jääger, Huusfrau no Bligg-Reporter
Niemerts wird zem Bääre-Morder.
E Nationalroot macht e-n-Aafroog an Bundesroot:
„Schigge mer d'Armee - s'isch noonig z'spoot?
Mit Panzer und Helikopter griege mer dä Bäär am Grind!"
Dr Bundesroot maint druff numme: „Dr Ruedi Käller spinnt!"
So isch das gfaarlig Dier bis hit verscholle.
Was isch uss em worde, däm Bääre-Bolle?
Wie haisst's in jedem Määrli doch?
„Wenn er nicht gestorben ist, so lebt er noch!"

Uns dunggt, dä Bäär sig von ere spezielle Sorte.
Är isch immer glainer und zem Schluss zue-n-ere Änte worde.
Nur d'Baselbieter Jääger sinn enttyscht, perseh.
Sie hänn sich scho als Grosswildjääger gseh!

Drum schigget die Waidmänner zem Exoote jaage
No Liechteschta. Dert dien d'Lytli klaage,
E digge Haas duet ihr Lääbe schteere.
Dä wurd äntlig emool in d'Pfanne gheere!

Dernoo wärde si in Kanton Schwyz abkommidiert,
Me miess en brämse, me wiss nit, wo's ane fiert,
Sy Unwääse wurd e schregglige Eb(n)er dert dryybe,
Und nit emool e baar Frangge Styyre ryybe.

Wänn sich d'Jääger aber am Ablig vo Bääre laabe,
Fahre si uff Bärn und gehn an Bääregraabe.

Waidmannshail!